

1 Tesalonicenses

Jacheuayama

¹ Atše Pablo, Silvano y Timotéoftaca, quem tsbuanácha sentsabiamná tšëngaftangbiana, chë Tesalónica bëts puebloca Jesucristbeñe ošbuáchiyëngbiana, tšëngaftanga chë Bëngbe Bëtsá chë Taitá y Bëngbe Utabná Jesucristoftaca cánÿiñe mo canÿacá šmomnënga. Atše sëntseimpadana Bëngbe Bëtsá, chaoma tsabe bendicionënga tšëngaftangbeñe chaotsemnama, y tšëngaftanga ainaniñe tsabe ebionana chašmotsebmnama.

Pablo Bëngbe Bëtsábioye tbojtanchuá chë Tesalónica pueblentsa entsangbe ošbuáchiyama

² Bënga sempre Bëngbe Bëtsá fsëndëtschuaná tšëngaftangbiana, y bënga cháftaca ftsencuénta ora, tšëngaftangbiana fchandbëtseimpadana.

³ Bënga, Bëngbe Bëtsá chë Taitáftaca ftsencuénta ora, fsëndbétsenojuabnaye ntšamo tšëngaftanga šmotrabájama, Jesucristbeñe ošbuáchiyana šmobómnayeca; ntšamo tšëngaftanga tša ínÿenga šmëjabuáchana, Jesucristo šmobobonshánayeca; y ntšamo tšëngaftanga, ndocna te ntjajbanacá, jtsošbuáchiyëse Bëngbe Utabná Jesucristbeñe šmobátmanama.

⁴ Jesucristbeyeca catšátanga, bënga fsëndëtatšëmbo Bëngbe Bëtsá cmababuánÿeshanama, y cha tcmojábacacama chábenga chašmotsemnama.

⁵ Bënga chë tsabe noticiënga Jesucristbiana tcbonjanabuayená ora, ndoñe nÿe bënga

jóyebuambayëse chca quenjatsmëna, ndayá chë Uámana Espíritbe obenanácnaca, y bënga corente jtsejuabnayëse chë buayenánana ndegombre soye bétsemnama. Tsëngaftanga corente šmondétatsëmbo ntšamo bënga ftsjamna tsëngaftangaftaca fsënjamna ora, tsabe soyënga tsëngaftangbiana nguayinë.

⁶ Chora, ntšamo bënga fsënjanamcá y ntšamo Bëngbe Utabná enjanियencá, tsëngaftanga šmonjanontsé amana; y chë buayenánana šmonjanóyëngacñe chë Uámana Espíritu tcmojanatšatá oyejuayánaca, masque ínÿenga tmojamna tsëngaftanga puerte chašmosufrima.

⁷ Mëntšá, tsëngaftanga uánatsanënga šmonjanobiana ntšamo ndegombre jtsiyenama, nÿetsca Macedonia y Acaya luarentša Jesucristbeñe ošbuáchiyëngbiana.

⁸ Tsëngaftanga šmojoyebuambá Bëngbe Utabná Jesucristbe palabrama. Mora, ndoñe nÿe Macedonia y Acaya luarentše entsanga chama quemátstatsëmbo –nÿets luarenache entságnaca montsetáttsëmbo ntšamo tsëngaftanga Bëngbe Bëtsábeñe šmojtsošbuáchema –y chca, bënga tondaye más quešnátëjaboto tsëngaftangbiana jatichámuama.

⁹ Cach entsanga montsoyebuambná chë bënga tcbonjánabuache ora tša tsabá tsëngaftanga šcojanëbuajama. Chëngnaca montsichamo ntšamo tsëngaftanga šmojtsajbaná chë šmojanjuabná diosënga yojamna soyënga adórayana y šmojanontsé chë tsabe benache jtishachama, y chë Bëngbe Bëtsá ndegombrá y

ainá jasérviamá,

¹⁰ y chca, chabe Uaquiñá Jesús jobátmama; mua celocana echanjésabo; chabiamá Bèngbe Bètsá tojanma obanènguentšana cháuatayenama, y cha šochanjátsebacaye chë uabouana castigüentšana, Bèngbe Bètsá entšangbe bacna soyèngama chèngbiamá yobomnentšana.

2

Ntsamo Pablo yojantrabája Tesalónica puebloca

¹ Cach tšèngaftanga, Jesucristbeyeca catšátanga, šmondétatsëmbo bènga tcbonjánabuache ora ndoñe nýe bonamente quenjatsmënama.

² Tšèngaftanga šmondétatsëmbo, bènga cabá tšèngaftangbiye nda ora, Filiposoca šonjanëyánguango y bacá šonjánaborlama; y masque tšèngaftangbioca bèngbe contra entšanga monjamna, Bèngbe Bètsá tonjanma bènga fchayobená chë tšabe noticiènga bètscá añémoca jabuátambama.

³ Er bènga entšángbiye bostero soyènga ndoñe queftsjatanabuayiyiná, tšèngaftangbiamá bacna soyènga ndoñe queftsjatanboše, y entšanga jáingñama ndoñe queftsjatanoyebuambná.

⁴ Bèngna inýetsá; Bèngbe Bètsá yojanjuabná bènga chabe trabajo jamama obenènga ftsjamna ca, y chca, šonjanëbuáyana chabe tšabe noticiènga entšanga jabuátambama, y chca bènga fsëndoyebuambná; chíyeca bènga ndoñe nýe entšangbe bominyiñe tšabá chaotsinýnama queftsátama, ndayá nýe Bèngbe Bètsabiamá, nda chë ndayá bèngbe ainaniñe yomnama yotátšëmbo.

5 Ntšamo tšëngaftanga corente šmondëtatšëmbo, bënga ndocna te tšëngaftangbiamana tšabe soyënga tifjanayana, tšëngaftanga bëngaftaca oyejuayënga chašmotsemnana; y ntšamo tšëngaftanga cbonjanëtsëtnacá ndoñe quenjatsmëna nÿe tšëngaftangbentšana ba soyënga bëngbiamana josháchiñama. Bëngbe Bëtsá chama yotátšëmbo.

6 Ndocna te bënga queftsatsngué entsanga más uamanëngcá bënga chašotsabiamnana, ni tšëngaftangbentšana, ni ínÿengbentšana.

7 Masque bënga, Cristbe ichmónënga bëtsemnana, matifjanobená tšëngaftanga nÿe sempre jtsamëndayana, bënga ndoñe chca chibiátanma; bënga corente jtsababuánÿeshanëse cbonjánanÿena, ntšamo canÿe mamá chabe básenga jtsabëchayana y corente bonshanánaca jtsanÿenana.

8 Tša cbonjánababuanÿeshanayeca, bënga ndoñe nÿe chë Bëngbe Bëtsabe tšabe noticiënga checbënjatanabuayená, tšëngaftanga chiñe chašmotsošbuáchema ntšamo bënga fsëndošbuachecá, ndayá bëngbe vidënga jáshbiamnana fsënjanprontana tšëngaftangbe tšabiamana. ¡Tša cbondábabuanÿeshana!

9 Jesucristbeyeca bëngbe catšátanga, tšëngaftanga šmenabouínÿna ntšamo bënga bëtsacá y jabuache fsënjantrabajama, Bëngbe Bëtsabe tšabe noticiënga abuayiynayiñe y bëngbe vida onguayiñe, chca, tšëngaftanga ndoñe chacmondëtsamnana bëngbe uajabótama bënga jatatšatnayama.

10 Cach tšëngaftanga šmondëtatšëmbo y Bëngbe Bëtsánaca, ntšamo bënga ftsjamna tšëngaftanga chë

ošbuáchiyëngaftaca fsënjamna ora; fsënjaniyena ntšamo Bëngbe Bëtsá tšabá tbojtsinýancá, nyetscángaftaca fsënjánama ntšamo jamama šojanamncá, y ndocná quenátobena jatichámuana ntšamo fsënjanamcá ndoñe tšabá yonjamna ca.

¹¹⁻¹² Tšëngaftanga šmondétatsëmbo, bënga bëtscá jóyebuambayëse cada ona tšëngaftanguentsá cbonjanéjabuachanama y cbonjánáñemuama, ntšamo canye taitá chabe básengaftaca endbetsamcá. Bënga bëtscá cbonjanëtsëtsná ntšamo Bëngbe Bëtsá tšabá tbojtsinýancá chašmotsiyenama; y Bëngbe Bëtsá cmontsëbuájajana chabe amëndayoye jamashënguama y chabe obenana y buashinýinýanana jinýama.

¹³ Bënga, Bëngbe Bëtsabe tšabe soyënga cbonjanabuayiyná ora, ntšamo tbonjanëyancá tšëngaftanga šmonjanuena y šmontsanošbuaché mo Bëngbe Bëtsábiocana buayenanancá, y ndoñe nýe entšangbe oyebuambnayanancá. Y ndegombre Bëngbe Bëtsabe buayenánana endmëna, y chë palábraca, tšëngaftanga chë chábeñe ošbuachiyëngbeñe Bëngbe Bëtsá bëtscá soyënga yojtsama. Chama sempre Bëngbe Bëtsá fsëndëtschuaná.

¹⁴ Jesucrístbeyeca catšátanga, cach tšëngaftangbe luarentša entšanga cmonjanëcamena ora y šmonjansufrina, šmonjanpasá ntšamo chë Judeoca Bëngbe Bëtsábeñe ošbuachiyëngcá enefjuanënga tmonjanpasacá, y chëngna Cristo Jesusbe entšanga mondmëna. Chënga tmonjansufrí cach luarentša entšanga, chë judiënga, chëngbioye monjanëcamena ora.

¹⁵ Chë judiëngbe bëts taitanga, Bëngbe Bëtsabe

juabna oyebuambnayëngbioye tmojtsanëbaye, y ntšamo chëngbe bëts taitanga tmojanmcá, chëngnaca Bëngbe Utabná Jesúsbioye tmojanóba, y chënga mondama bënga chaftsesufrinama. Chënga ndoñe tšábenga Bëngbe Bëtsabe bominyiñe quemátsmëna, y nÿetsca entšangbe contra montsemna.

16 Chë ndoñe judiëngbioye, Bëngbe Bëtsá cháuatsebacama jábuayenama fstseboše ora, chë judiënga bëtsá jtsamana bënga ndoñe fchandobenama chca jamama. Judiënga nÿets tempo bacna soyënga monjánama; pero chë entšanga jábuayenama bënga ndoñe fchandobenama jtsamana, entsemna chë último bacna soye ntšamo chë judiënga jamama imojtsobencá, más ya ndoñe; y mora, cabana, Bëngbe Bëtsá ya puerte chëngaftaca tbojetna y echanjácastigaye.

Pablo tša yojánboše, Tesalónica puebloca entšanga jányama

17 Jesucrísbeyeca catšátanga, bënga tšëngaftangbentšana baseftayté jëftseboचना sonjanotocá ora, masque ndoñe choca tšëngaftangaftaca queftsjátanmëna, sempre tšëngaftangbiamá fsënjanenojuabná, y tša fsënjánboše tšëngaftangbioye jtésana jautsëtsayama.

18 Bënga fsënjánboše tšëngaftangbioye jésana; chíyeca cach atše Pablo, ba soye sënjanóshenguënja jobenayama choye jésama, pero Satanás yojantrabája bënga ndoñe fchandobenama chca jamama.

19 Atše sentsanboše tšëngaftanga jautsëtsayama, er tšëngaftangbeyeca Bëngbe Utabná Jesusbe delante, cha yochjésabo ora, ntšamo tšëngaftanga šmoyenama, bënga puerte jtsošbuáchiyëse fchantsobátmana, corente oyejuayënga fchtsemnana y más bëtsëtsanga fchtsemnana.

20 Aíñe, ndegombre, ntšamo tšëngaftanga šmoyenama, bënga bëtská añémoca ntšamo tšëngaftangbeñe tifjamama fsëndbétsoyebuambnaye, y tša oyejuayënga fsëntsemna.

3

1 Chíyeca ya ndoñe chibiatanobená más jatobátmanana tšëngaftanga jautsëtsayama; as fsënjanjuabó nÿe bëndata Atenas bëts pueblentše joquédana,

2 y jíchmuana Jesucrístbeyeca bëngbe catšata Timoteo, chë bëngaftaca trabajayá, Bëngbe Bëtsábioye oservéniñe, tšabe noticiënga Cristbiana entsanga abuyayinayañe. Fsënjanichmó chacmañémuayama y chaotsamama tšëngaftanga Jesucrístbeñe más chašmotsošbuáchema;

3 y chca, ndocná Jesucrístbeñe ošbuáchiyana chaondájbanama, masque tšëngaftanga Jesúsbeñe ošbuáchiyënga bétsemnana, ínÿenga imojtsama chašmotsesufrínana. Er cach tšëngaftanga šmondëtatšëmbo bënga šojtsamna chca quem luarentše jëftsepadecénana.

4 Y cabá tšëngaftangaftaca fsënjëftsemna ora, tcbonjanëyana bënga šojánamna jasúfriana; y ndegombre chca tonjopasá, ntšamo tšëngaftanga ya šmondëtatšëmbcá.

⁵ As y chë tšëngaftangbiana jtsetatšëmbuama más jatobátmanana ndoñe quetstétsobenayeca, sënjanjuabó šojétsemna Timoteo jíchmuana. Sënjanichmó atše jtsetatšëmbuama aíñe bëtscá o ndoñe tšëngaftangbe ošbuáchiyana Jesucristbeñe tayojamnama, er atše yapa sënjanjuabná nderado Satanás tojanma tšëngaftanga bacna soyënga chašmotsamama, y chca, bëngbe trabajo tondayama chaondëtso servénama.

⁶ Pero mora, Timoteo tšëngaftangbiocana tontashjango y tonjúshjango noticiënga, y bënga chama oyejuayënga fsëntsemna, ntšamo tšëngaftanga bëtscá Jesucristbeñe šmojtsošbuáchema y nyëtscanga šmenbobonshánama. Cha šonjacuntá ntšamo tšëngaftanga corente oyejuayënga bëngbiana šmuatenajuabnama, y ntšamo tšëngaftanga tša šmojtseboše bënga jányama, cachcá ntšamo bënga tšëngaftanga jányama tša fsëntsebošcá.

⁷ Quem sóyeca, Jesucristbeyeca catšátanga, y mora chë bënga nyëtscá chë padecena soyënga fstsebmna ora y ínÿenga bënga jasúfriama imojtsama ora, bëtš añemo fsëntsebmna, ntšamo tšëngaftanga tša Jesucristbeñe šmojtsošbuáchema jtsetatšëmbëse.

⁸ Jtsetatšëmbuana tšëngaftanga sempre puerte tšabá Bëngbe Utabnáftaca šmoyenama, entsama bënga más añémoca chaftsiyenama.

⁹ Mora fchantsobena Bëngbe Bëtšá jtsatschuanayana tšëngaftangbiana, y chë tšëngaftangbeyeca chabe delante bënga oyejuayana ftsbomnámnaca.

¹⁰ Cada te, bnëté y ibeta, tša Bëngbe Bëtšá fsëndétseimpadana jobenayama tšëngaftanga

jautsëtsayama chašualesenciama, Bëngbe Bëtsabe palabra tšabá chašmobedecema, chë buayenánana ntšamo yojtsashbencá jabuátambama.

¹¹ Bënga, Bëngbe Bëtsá fsëntseimpadana, cachá y Bëngbe Utabná Jesús, chašújabuache bënga fchayobenama tšëngaftangbioye jama jautsëtsayama.

¹² Y Bëngbe Utabná chaoma más bëtscá chašmotsenbobonshánama, y cachcá corente nyetscángaftaca, ntšamo bënga cbondababuanyëshancá.

¹³ Chca, tšëngaftangbe ainaniñe bëtscá añemo šmochántsebomna; y Bëngbe Utabná Jesús cachábengaftaca chaojésabo ora, Bëngbe Bëtsá Bëngbe Taitabe delante ndocná chaodayana, ntšamo tšëngaftanga šmojamcá ndoñe tšabá yontsemna ca, er tšëngaftanga šmondmëna Bëngbe Bëtsábenga, nýe cha jtseservénama.

4

Ntšamo jtsiyenama, Bëngbe Bëtsá oyejuayá chaotsemnama

¹ Y mora inýe palabra šmochjatspaséncia. Jesucrístbeyeca bëngbe catšátanga, tšëngaftanga bëngbentšana šmonjanatsjinýe ntšamo jtsiyenana cmojánamna, ntšamo Bëngbe Bëtsábioye oyejuayá jabemama yomncá, y ndegombre chca tšëngaftanga šmondoyena. Y mora Bëngbe Utabná Jesusbe cuenta, cbontsaimpadana y becá cbontsëtsëtná más chca chašmotsamama.

² Tšëngaftanga šmondëtatšëmbo ndayá tifjánayana ntšamo tšëngaftanga chašmotsiyenama,

y chca fsēnjanma Bēngbe Utabná Jesús chca jamama šonjanamēndáyeca.

³ Bēngbe Bētsá endboše tšēngaftanga chašmotsiyenama mo Bēngbe Bētsabengcá, ndocná bacna soyēnga boyabása o shembásaftaca chaondětsamama,

⁴ y n̄yetscanga chamotsobena ntšamo can̄ye shema janguanguana, chē ntšamo can̄ya Bēngbe Bētsábia yomná jamama ibomncá, y ntšamo entsangbe bominyiñe tšabá yomncá,

⁵ y ndoñe chabondónguango n̄ye cháftaca bacna soyēnga chēngbe cuérpoca jamama, ntšamo chē Bēngbe Bētsábioye nduabuátmēnga mondbetsamcá.

⁶ Chē palabriñe ndocná chabe catsátbioye chabondēingñé, chē catsatbe shēmaftaca bacna soye jamēse, er chca amēngbioye Bēngbe Utabná corente echanjácastigaye. Chíyeca bēnga ya bētscá chama tchbonjabuayená.

⁷ Er Bēngbe Bētsá ndoñe šonjánachembo bacna soyēnga boyabása o shembásaftaca jtsamama, ndayá ntšamo tšabá yomncá jtsamama, ntšamo chabe entsanga mondbetsamcá.

⁸ Mēntšá, nda quem buatēmbana soyēnga tojtsábotena, cha ndoñe n̄ye entsanga jtsébátenana, ndayá Bēngbe Bētsábioye, nda tšēngaftangbe ainaniñe Uámana Espíritu cháumashēnguama tojama.

⁹ Atše ndoñe quešnátsmēna juabuábiamana ntšamo cmojtsamna ín̄yēnga Jesucristbeñe ošbuáchiyēnga jtsababuán̄yeshanama, er cach Bēngbe Bētsá tcmonjabuatambá n̄yetscanga chašmotsenbobonshánama.

10 Y ndegombre, tšëngaftanga chca šmondama nyetsca Macedonia luarentse Jesucristbeñe ošbuáchiyëngaftaca. Pero cbontsaimpadana, Jesucristbeñe catšátanga, más chca chašmotsamama.

11 Nya sempre quem soyënguiñe šmochtsentšena: natjëmbana jtsiyenana, ínÿengbe soyënguiñe ndoñe ntsontremeténana, y ndoñe ntjatobátmanana nyë ínÿenga tšëngaftangbiama chamotsetrabájama, ntšamo tcbonjanëyancá tšëngaftangaftaca fsënjamna ora;

12 chca šmochtsama, chë ínÿenga Jesucristbeñe ndošbuáchiyënga chacmotsarrespetánama, y ndocnábeñe ntjatobatmancá šmochantsobena jtsiyenana.

Bëngbe Utabná quem luaroye yochjésabo ora

13 Bëngbe catšátanga, bënga fsëntseboše tšëngaftanga ndegombre chašmotsetátšëmbo ntšamo chë obanëngaftaca yochjopásama, y chca, tšëngaftanga ndoñe ngmenánaca chašmondëtsemnana, mo chë inÿengcá, chë tcojóbanentšana ndoñe yontsemna jtayenama ca juabnayëngcá.

14 Bënga fsëndošbuaché Jesús tojanóbana y tojtanayenama, y cachcá bënga fsëndošbuaché chë tmojóbanënga y Jesúsbeñe tmojtsošbuáchese, Bëngbe Bëtsá chëngbiama yochjama chë nyetsca tescama yomna tšabe vida Jesucristoftaca chamotsebomnana, y quem luaroye cháftaca chamuatábama.

15 Chë soyama bënga cbontsëtsëtsná ntšamo cach Bëngbe Utabná tojëftsanabuatambacá: Bëngbe Utabná chaojésabo ora, chë ošbuáchiyënga chë te

cabá ainënga chamojtsemnënga, chábioye ndoñe quemochátinyëna tsbanánoca, más natsana chë ya obanënga chë te mochtayenëngbiama.

¹⁶ Er entsanga mochanjouena canye mando juayebuáchenana, chë angelëngbe amëndayabe oye-buambnayana y chë Bëngbe Bëtsabe trompetëfjua juajatëtámna, y chora cach Bëngbe Utabná celocana echanjástjango. Y chë tmojóbanënga, Crístbeñe imojanošbuachenga, natsana mochántayena;

¹⁷ chentsana, chë ainënga chamojtsemnënga chëngaftaca cányiñe Bëngbe Bëtsá šochanjúyamba, Bëngbe Utabná yochtsemnoca jashjanguama, chë celoca jantšetëshënga endmënoca; as chentsana nyetsca tescama cháftaca bënga mochántsemna.

¹⁸ Quem palabrëngaca nyetscanga ndoñe más ngmënana ainaniñe chašmondëtsebonna.

5

¹ Jesucrístbeyeca catšátanga, ndoñe quenátsiyta atše jubuábiamana mocna ora chë soyënga yochjopásama.

² Cach tšëngaftanga corente šmondëtatšëmo, Bëngbe Utabná yochjésabo chama ndocná chaondëtsejuabná ora, mo canye atbëbanacá jashjanguana ibeta ndocná chama tonjatsjuabná ora.

³ Entšanga chamojayana: “Lempe tšabá endëtsomñe y tondayama quešnátamna játauatjana ca”, chora nye ndeolpe chë entsangbiama tša jasúfriama echanjóshjango, mo canye shembása šëšona jtsebonnama ora nye ndeolpe jasúfriama jóntšancá; y ndegombre, entsanga chca jasúfriama quemochatotsbocá.

4 Pero tsëngaftanga catsátanga, ndoñe quešmátiyena mo ibetiñcá, bacna soyënga jtsejuabnayëse y jtsamëse; y chca, Bëngbe Utabná chaojésabo ora, tsëngaftanga ndoñe auatjanánënga quešmochátsmëna, mo ndábioye canye atbëbaná tbojotbá ora, chábioye cuaftsauatjanacá.

5 Nyëtsca tsëngaftanga šmondmëna entsangbe juabna binynayabe básenga, y mo binyniñcá šmondoyena. Bënga ndoñe chë ibetiñe mandayabe básenga quemuátsmëna, y mo ibetiñcá ndoñe quemuátiyena;

6 chíyeca bënga ndoñe quešnátamna jtsemnana mo chë cachëngbe cuerpo jenomándama ndobenëngcá, chë mo cuaftsemangcá oyenënga. Pero aïñe šontsamna mo chë fšnëngcá jtсийenana, bëngbe cuerpo jtsemándayëse y nyëts tempo jtseprontánëse.

7 Ibeta ora entsanga jtsemangana, y cach ibeta tojtsemna ora entsanga jotmenangana;

8 pero bënga, chë binynentsëngna, šontsamna sempre bëngbe cuerpo jtsemándayana. Sontsamna Bëngbe Bëtsábeñe jtsošbuáchiyana y cha jtsebobonshánana, chë uayaná Satanasbiamá jenëuyanama y cha jayënjanama, mo canye soldadcá, canye morochó soye cochaca jenácochjatsana jtsevalentiamá y ndoñe chamondëyënjanama. Y chë castigüentsána Bëngbe Bëtsá šochjátsebacamnaca puerte jtsošbuáchiyëse jtsošbátmanana; y chca, bënga mochántsemna mo canye soldadcá, cha canye casquëse juabuchëtsana jenëuyanama.

9 Er Bëngbe Bëtsá ndoñe šonjáchembo

bënga chašotsamnana chë nyetsca tescama castigo jtsebmnama. Ndayá Bëngbe Bëtsá šojabacacá, Bëngbe Utabná Jesucristbeyeca bënga chamótsbocama.

10 Cha bëngbiana tojanóbana, bënga cháftaca cánÿiñe jtsiyenama chamotsobenama, masque ainënga o obanënga chamojtsemnëse, cha chaojésabo ora.

11 Chíyeca, nyetscanga šmochtsenañemuaye y šmochtsenájabuachana más jtsošbuáchiyama, ntšamo tšëngaftanga mora ya šmontsamcá.

Pablo choca ošbuáchiyënga jábuayenama

12 Jesucristbeyeca catšátanga, cbontsaïmpadana chašmotsarrespetana chë Bëngbe Bëtsabiana tšëngaftangbeñe trabajayëngbioye, y chë Bëngbe Utabná tšëngaftanguentše tojábacacanga uánatsanënga chamotsemnana y ntšamo jtsiyenama cmojtsamnana chácmbuayenama.

13 Cmontsamna chënga jtsarrespetánana y jtsababuánÿeshanana, ndaye trabajo chënga imojtsamama. Natjëmbana nyetscángaftaca šmochtsiyena.

14 Quem soyënga chašmotsamámna cbontsaïmpadana: jatrabájama ndoñe tmontsebošëngbioye šmochjucácana, añemo ndbomnëngbioye šmochjáñemuaye, bëtsá ošbuáchiyana ndbomnëngbioye šmochjújabuache, y uantadënga nyetscángaftaca šmochtsemna.

15 Cuedado šmochtsebomna, nderado nda bacna soye tbojaborlase, ndocná ndoñe cachcá chabondëtachnënguama. Masna, nye šmochtsentšena nyets tempo tšabe soyënga

jtsamama cach tšëngaftanguentsšëngaftaca y nyetsca entšangaftácnaca.

16 Nyets tempo oyejuayënga chašmotsemna.

17 Sempre Bëngbe Bëtsáftaca šmochtsencuéntaye.

18 Nyetsca soyënguiñe Bëngbe Bëtsá šmochtsatschuanaye; er chca entsemna ndayá cha yojtseboše, bënga Cristo Jesúsbeñe ošbuachiyëngcá chamotsamama.

19 Ndoñe šmattsama ntšamo chë Uámana Espíritu tšëngaftangbeñe yojtsamcá chaotsopochocama.

20 Ndoñe šmattsábotena chë Bëngbe Bëtsabe juabna oyebuambnayëngbe buayenana soye.

21 Yejuana šmochjájuaboye y šmochjayana, chë Bëngbe Bëtsabe juabna oyebuambnayá yomna ca tojtsichamuabe buayenánama ndegombre Bëngbe Bëtsábiocana tayóbocanama, y chentša tšabe soyënga šmochjobuajo y sempre chca šmochtsama.

22 Nyetsca bacna soyënguentšana šmochtsojuánañe.

23 Cach Bëngbe Bëtsá, chë bëngbe ainaniñe tšabe ebionana chamotsebomnama endamá, nyetsca soyiñe tšábenga chacá chacmabiana, y nyets tšëngaftangbe espíritu, ainana y cuerpo chaotsinyena, Bëngbe Utabná Jesucristo chaojésabo orscama; y chora, ntšamo tšëngaftanga šmojamama bacna soyënga yojtsemna ca ndocná chaondayanama.

24 Nda tcmojúbuaja chábenga chašmotsemnama, cha sempre jtsamana ntšamo tojayancá, y lempe cha echanjama.

Inye rueguënga chëngbiana y jtadióšoftanama

²⁵ Jesucristbeyeca catšátanga, Diosmanda, bēngbiámnaca Bēngbe Bětsá šmochtseimpadana.

²⁶ Njētscángbioye mo Jesucristbeyeca catšatangcá šmochjácheuaye, jtenámochēse, ntšamo cach tšēngaftangbe pamíllanga puerte bonshanánaca šmondbetsacheuanaycá.

²⁷ Cbontsaměnda quem tsbuanácha njētsca Jesucristbeñe ošbuáchiyēnga chašmēbuáliama, y chca sěntsama, Bēngbe Utabná chca jamama šojanmandáyeca.

²⁸ Atše sěntseimpadana Bēngbe Utabná Jesucristo, chaoma tšabe bendicionēnga tšēngaftangbeñe chaotsemnama.

Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 18 Apr 2025 from source files
dated 29 Jan 2022
19104c0e-9046-5ff3-82fb-eb838c88dcf9